

Amaruba ga Pahulu imwa' Bafiripi Indangiriro

Mu yaga maruba, Pahulu ali mu yandika ubugira kingi ngiisi kwo tukwaniini tukizi sham-baala mu kati ka Kirisito.

Pahulu anali mu tanga kongwa imwa'Bafiripi, bwo bâli kizi mûtabaala ku magoorwa ga'magala gaage. Na kwakundi, anababwira kwo bakizi tuula ku butuudu buzira kuyidodomba. Banakizi yibagira keera îbikalenga, banabe bafitiirwi ku bya Rurema.

Yaga maruba gali mu yerekana ngiisi kwa'Bakirisito bakwaniini ukutuula: (a) Tukizi yibiika haashi (2.1-4); (b) Tukizi fiitirwa ku kalimbi ákakiri ha mbere (3.13-14); (c) Tukizi tuula mu kati ko'mutuula (4.6); (d) Tugire byoshi ku bushobozi bwa Rurema (4.13).

Muziizi muguma gwi'sikamiro, guli mu Bafiripi 4.4: «Mukizi yama mushambiiri mu kati ka Nahano! Namûbwira kandi, mukizi shambaala!»

Îbiri mwo ku bwofi

- a) Indangiriro (1.1-2)
- b) Pahulu atanga kongwa hi'gulu Iya'Bafiripi, anabahuunira (1.3-11)
- c) Kundu Pahulu ashwekwa, Umwazi Mwija gugenderiiri (1.12-20)
- d) Ukuhanuula (2.1-18)

- e) Pahulu ayivuga abaabo bakozi ba Rurema (2.19-30)
- f) Ngiisi byo Pahulu ali mu fitirwa kwo (3-4.1)
- g) Tukwaniini tukizi yuvwikana, tunabe tushambiiri (4.2-9)
- h) Pahulu adeta kongwa ku lutengu (4.10-20)
- i) Pahulu anasezerana (4.21-23)

Indangiriro

¹ Nieve Pahulu, twe na Timoteyo, twe bakozi ba Yesu Kirisito. Twe tunagweti tugamùyandikira, mwe bandu ba Yesu Kirisito mweshi ba mu kaaya ke'Firipi, kuguma na'bangere biinyu bi'shengero, na'batabaazi baabo.

² Daata Rurema na Nahamwitu Yesu Kirisito bakizi mùgashaanira! Banakizi mùheereza no'mutuula!

Ibyo Pahulu ahuunira Abafiripi

³ Ngiisi kyanya ndi mu mùkengeera, ndi mu tanga kongwa imwa Rurema wani hi'gulu liinyu. ⁴ Ne'kyanya ndi mu mùhuunira mweshi imwage, kuli mu ba ku bushambaale bweneene.

⁵ Mukuba, muyamiri muli mu ndabaala mu guno mukolwa gwe'Myazi Miija, ukulyokera ku lusiku lwo n'gatondeerera kwo, halinde zeene.

⁶ Rurema keera akatondeera umukolwa mwija mu kati kiinyu. Na ndi na'kasiisa kwo agagugendereza, halinde aguyuse ku lusiku lwo Yesu Kirisito agagaluka kwo.

⁷ Bingwaniini ngizi yiyuvwa hi'gulu liinyu mweshi, bwo mudi ku mutima. Mweshi muli mu longaga ku bugashaane bwa Rurema

kuguma na naani, kuba ku kyanya ngoli shwesirwi mu nyumba ye'mbohe, kandi iri ku kyanya ndi mu genda ngabulanira Imyazi Miija, mu kuyerekana kwo iri yo'kuli. ⁸ Rurema, ko kamasi kaani kwo ngoli mukumbwiri mweshi mu kati ko'rukundo lwa Yesu Kirisito.

⁹ Ngweti ngamuhuunira imwa Rurema, kwo'rukundo lwinyu lukizi yushuuka bweneene mu kati ko'bumenyi bwoshi. Kwokwo, lyo mulonga ukukizi sobanukirwa na byoshi, ¹⁰ halinde mumenye ibiri biija. Mugayama muli beeru, munabe buzira buhube, halinde ukuhisa ku lusiku lwo Yesu Kirisito agagaluka kwo. ¹¹ Na ku njira yage, munabe mukola mu gira byoshi ibikwaniini. Kwokwo, Rurema akizi huuzibwa mu kati ko'bulangashane!

Pahulu ayemiiri kwo agagenderera mu mukolwa

¹² E beene witu! Ndoziizagi mumenye bwija kwo kundu ngola mushweke, haliko, Imyazi Miija iki gweti igagenderera. ¹³ Abasirikaani booshi abali mu langa mwami, kuguma na'bandi booshi, bakoli yiji kwo njwesirwi hi'gulu lya Kirisito. ¹⁴ Na kwakundi, kuno kushwekwa kwani, kwo kutumiri beene witu Bakirisito bingi bakoli kaniziizi imitima. Banali mu menyeesa abandu igambo lya Rurema buzira kyoba, mu kati ko'bukaruuke bwoshi!

¹⁵ Biri ukuli kwo baguma bagweti bagayigiriza Igambo lya Kirisito hi'gulu lyo'luugi, na mu kati ke'mbamba. Kundu kwokwo, abandi bali mu liyigiriza ku mutima mwija, ¹⁶ na mu kati ko'rukundo. Mukuba, bayiji bwija kwo

Rurema akambiika hano, gira ngizi bulanira Imyazi Miija. ¹⁷ Si yabo banakuhambwa, boohe, bagweti bagayigirizagya Igambo lya Kirisito ku bulyalya, mu kuhambirira ubukulu. Banalozizi ukumbuliisa umutuula ku kino kyanya ngi shwesirwi. ¹⁸ Kundu kwokwo, imwani kitali kindu. Ibiri na'kamaro naaho, bwi'gambo lya Kirisito ligweti ligayigirizibwa, kuba ku bulyalya, kandi iri mu kati ko'kuli. Kyo kitumiri njambiiri. Nganagenderera ukushambaala.

¹⁹ Kundu n'galongaga amakuba, nyiji kwo ngaki kizibwa mu kati kaago. Mukuba, mugweti mugambuunira imwa Rurema. No'Mutima gwa Yesu Kirisito, gugweti gugandabaala kwakundi. ²⁰ Ndangaliiri kwo ndaabyo ibyangandeera ishoni. Si ngakizi yama nganiri mu mutima, halinde Kirisito agenderere ukukizi huuzibwa mu magala gaani, kuba mu kukira kwani, kandi iri mu kufwa. ²¹ Niehe, ukuba ho, kulyagagi hi'gulu lya Kirisito! Ne'ri nangafwa, lyo ngagenduukirwa. ²² Ikyanya ngi tuuziri mu gano magala, ngaki genderera ukukola imikolwa miija. Aaho! Lihy lyo nangatoola? Ndayiji! ²³ Ngweti ngakwegwa imbande zombi. Ku luhande luguma, ngola mu yifwija ukushaaga hano, ngendi beera kuguma na Kirisito. Iri kwangakoleka, kwo kukulu bweneene! ²⁴ Haliko hi'gulu liinyu, ngwiriiri ndee beera mu magala. ²⁵ Ndi na'kasiisa kwo ngagenderera ukutuula ho. Kwokwo, tunabeeranwe, halinde mugenderere mu bwemeere bwinyu, munabe mubushambiiri mwo. ²⁶ Ne'kyanya tugashubi yiji beeranwa,

mugashambaala bweneene hi'gulu lyani, mu kati ka Yesu Kirisito.

²⁷ Mwehe, mukizi tuula naaho ukukulikirana na kwe'Myazi Miija ya Kirisito idesiri. Ne'ri nangayiji mütanduula, kandi iri nyuvwa naaho imyazi yinyu ku hala, lyo ngaaba nyiji kwo muki sikamiri ku mutima muguma, iri munaguguma kuguma, munabe muli mu lwira Imyazi Miija. ²⁸ Na kundu abagoma biinyu bangagira mbu bamuhangirire, mutaleke mbu bamuteere ikyoba. Yibyoyi, kyo kigaaba kyereso imwabo kyo'kuyerekana kwo bagaki shereezibwa. Ne'mwinyu, kinayerekane kwo mugakizibwa. Kugaanaba ku njira ya Rurema yenyene. ²⁹ Mukuba, keera mukahaabwa ubulyo bwo'kuyemeera Kirisito. Munakoli ba no'bulyo kwakundi bwo'kulibuuka hi'gulu lyage.

³⁰ Amalibu go mugweti mugahagana mwo, go na gaago naani nâli kizi hagana mwo, nga kwo mwenyene mwâli kizi bona. Kiri na buno, mukiri mu yuvwa kwo ngi gweti ngakizi gahagana mwo.

2

Tukizi yiga ibya Kirisito ku butuudu

¹ Ka mukoli kaniziibwi imitima mu kati ka Kirisito? Ka munakoli holeziibwi mu rukundo lwage? Ka munakola ne'ngoome mu kati ko'Mutima Mweru? Ka munali mu yuvwirana indengeerwa mu kati ke'kimino? ² Iri byangaba kwokwo, munjambaaze lwoshi mu kukizi yuvwanwa, iri munakizi kundana mu kati

ko'buguma! Munabe mwe baguma mu mitima yinyu, iri munakizi huugiza kuguma.

³ Mutakizi ki kubirira ubukulu! Mutanakizi yikangaata. Si mukizi ba batuudu! Munakizi bona kwa'bandi bo bamùkuliiri. ⁴ Mutakizi ki yihahalira! Si mukizi hahalira na'bandi kwakundi.

⁵ Mukizi ba ne'mitono iri nga ya Yesu Kirisito:

⁶ Kirisito, kundu âli yamiri nga ngiisi kwo Rurema ali,

halikago atanagira mbu amúyigereere.

⁷ Si akayigira nga atali kindu, anaba mukozi.

Ee! Anaba akola mundu ngana.

Na bwo âli kola ne'njusho ya'bandu,

⁸ anayibiika haashi bweneene,

anasimbaha halinde ukufwa,

kiri na mu kuyitirwa ku kibambo!

⁹ Yibyoyi, byanatuma Rurema agamúkuzagya abe hi'gulu lya byoshi,

anamúyinika iziina írihimiri agandi gooshi.

¹⁰ Kwokwo, ikyanya iziina lya Yesu ligaadetwa,

ibiremwa byoshi biyame bigafukama,

biba bya mwi'gulu, kandi iri bya mu kihugo,

kiri ne'bya mu kuzimu.

¹¹ Ngiisi lulimi lunadete kwo Yesu Kirisito ye Nahano,

halinde Daata Rurema anayivugwe!

Tukizi kania ubukize ku bushambaale

¹² E bakundwa baani! Mwâli kizi nzimbaha ku kyanya twâli ki ririinwi, kiri na ku kyanya n'gaba ngola hala. Kwokwo, na buno, mukizi ba no'mwete gwo'kukizi yikwanania mu bukize bwinyu. Mukizi yoboha, iri munajuguma!

¹³ Mukuba, Rurema ye mu kola mu kati kiinyu,

halinde ngiisi byo aloziizi, binabe byo niinyu mugakizi looza, munakizi bigira.

¹⁴ Ku yukwo, ngiisi byo mugaagira, mukizi bigira buzira kuyidodomba, na buzira kupaa-pana! ¹⁵ Kwokwo, lyo muba baana bataluule ba Rurema, munabe bazira mahube. Abandu ba kino kibusi bakoli sherebiiri, keera ban-abihuuka bweneene. Kundu kwokwo, mwehe mukizi ba nga ndonde iziyasiri mu kati kaabo! ¹⁶ Munakizi bayereka Igambo iriri mwo'bugumaana. Kwokwo, lyo'mukolwa gwo nali kizi himbukira kwo mu kati kiinyu, gutayiji kengeera gwafwa ubusha. Na ku lusiku lwo Kirisito agagaluka kwo, na ndonge ukushambaala hi'gulu liinyu.

¹⁷ Mwehe, mu kuyemeera Kirisito, mukayitanga ngi'tuulo imwa Rurema. Kwokwo, na naani buno, hali ikyanya nangatangwa ituulo lyo'kuyitwa hi'gulu lyage. Kundu kwokwo, ngashagaluka naaho, na njambaale kuguma na niinyu mweshi. ¹⁸ Na niinyu kwakundi, muk-wiriiri mukizi shagaluka, iri tunashambaalira kuguma.

Umwazi gwa Timoteyo na Hepafurodito

¹⁹ Ndangaliiri mu kati ka Nahano Yesu kwo ngola ngamutumira Timoteyo, gira akayiji mmenyeesa imyazi yinyu, inamboleeze. ²⁰ Yehe, ye mu muhahalira bweneene. ²¹ Si abandi booshi, bakolaga mu yihahalira boonyene. Batanakiri mu hahalira ibya Yesu Kirisito. ²² Haliko Timoteyo yehe, muyiji ngiisi kwo

keera akayerekana akamaro kaage mu kukolera Imyazi Miija twe naye, ngo'mwana na yishe. ²³ Ku yukwo, mango mbonaga ngisi kwe'bya hano bigambeera, ngoli shungisiri kwo ngamútuma iyo munda imwinyu. ²⁴ Ndi no'mulangaaliro mu kati ka Nahano kwo kiri na nienyene, ngola ngayija iyo munda.

²⁵ Haliko buno, mbwini kwo bingwiriiri ndee mûgalulira mwene witu wa Hepafurodito, ulya ye mukandumira ne'bindu byo'kundabaala ku magoorwa gaani. Yehe, ye tugweti tugaakola kuguma hi'gulu lye'Myazi Miija, tunali mu gilwira kuguma. ²⁶ Na buno, uyo Hepafurodito akoli mûkumbwiri mweshi. Umutima gwage, gutanakiri mu nda, bwo mukayuvwa kwo akalwala. ²⁷ Biri ukuli kwo âli lembiri bweneene! Anâli kola bu fwa. Kundu kwokwo, Rurema anamûbonera ulukogo. Atanali yehe naaho. Si kiri na naani, akalumbonera, gira umwizingeerwe gwani gutayiji kengeera gwayushuulirwa kwo'gundi.

²⁸ Kyo kitumiri ngoli loziizi bweneene ukumûtumira Hepafurodito, gira mango mwashubi mûbona, mukalonge ukushambaala. Na naani, umutima gunayike mu nda. ²⁹ Mumûyakiire mu kati ka Nahamwitu ku bushambaale bwingi. Na ngiisi mundu úlyagagi ngo'yu, mukizi mûheereza ulushaagwa. ³⁰ Umukolwa gwa Kirisito, gwo gukatuma agayija ho angasiga itwe. Anâli kola agalisiga ho, mu kumbikiza ubutabaazi, bwo mwenyene mutâli shobwiri ukubuleeta.

3

Pahulu akoli fitiirwi ku bya Kirisito

¹ E beene witu! Mu kuyusa, namùbwira kwo mukizi shambaala mu kati ka Nahano! Yaga magambo go keera n'gagwanwa namùyandikira, ndaluhiri ukushubi mùyandikira go. Mukuba, gali ga kumùlanga.

² Mukizi ba masu mu yabo banangoramabi. Mukuba, bali tubwa two'kuyonona amagala! ³ Halikago, twehe, twe tutengwirwi ku njira yo'kuli. Mukuba, twe tuli mu yikumba Rurema ku njira yo'Mutima gwage, iri tunashambaalira Yesu Kirisito. Si tutakiri mu yegamira ibya magala. ⁴ Yiby bya'magala, kiri na naani nangabiyegamiiri kwo, iri nangaloziizi. Aaho! Umundu nga angayihumeera kwo hali ibyangatuma agayegamira ku bya'magala, si niehe yo ingingwe!

⁵ Ndyagagi wa mu mulala gwa'Bahisiraheeri. Na ndi Muheburaniya nirizina wa mwi'kondo lya Binyamiini. Ne'ri n'gahisa isiku mu-naana mbusirwi, nanatenguulwa. Ku luhande lwe'Maaja za'Bayahudi, nâli kizi zikania bwe-neene, bwo nâli riiri Mufarisaayo. ⁶ Ndaanabwo buhube bwo nâli kizi zihubira. Na bwo nâli fitiirwi bweneene, kyanatumaga ngakizi libuza kiri ni'shengero.

⁷ Yiby byoshi, kundu byâli mbitiiri akamaro, halikago hi'gulu lya Kirisito, ngoli bibwini kwo byâli riiri bya kumbombeesa naaho! ⁸ Bitanali byebyo naaho. Si ne'bindi byoshi kwakundi, ngoli bibwini nga ruhombo. Keera nanabihomba kwo hi'gulu lya Nahamwitu Yesu

Kirisito. Ukumenya Kirisito, kwo kuhimiri byoshi! Kwokwo, birya bindi, ngoli biharwiri ngi'jolera, gira lyo ndonga ibya Kirisito, ⁹ na mboneke mu kati kaage. Ndaki yegamiiri Imaaja za'Bayahudi, mbu lyo ndonga ukukwanana imbere lya Rurema ku njira yazo. Si ukukwanana kwani, kube ku njira yo'kubiika Kirisito kwo'bwemeere. Mukuba, ukukwanana mwene yukwo, kwo kulyosiri imwa Rurema. Kunali mu ba ku njira yo'bwemeere. ¹⁰ Ndoziizi ukumenya Kirisito, na menye no'bushobozi bwo akazuuka mwo mu bafwiri. Na kwakundi, ndoziizi mbe ne'ngoome mu malibu gaage, ninamúshushe na mu lufu lwage, ¹¹ halinde ngalonge ukuzuuka mu bafwiri, kuba ku njira nyiki!

Tukizi yihangaanira akalimbi

¹² Yibyo byoshi, ndadesiri kwo keera n'gabigira. Ndanadesiri kwo ngoli tungiini ku byoshi. Kundu kwokwo, ngiri mu yihangaana, gira lyo ndonga ukuyakiira byo Yesu Kirisito naye keera akangwakiza kwo. ¹³ E beene witu! Yibyo byoshi, ndabwini kwo keera n'gabilonga. Ndi mu fitirwa kwi'gambo liguma naaho. Byoshi keera íbikalenga, ndi mu biyibagira. Na ngweti ngakubiriza ku kalimbi ákakiri ha mbere. ¹⁴ Ngoli fukeriiri, gira ngakahike kwo, halinde ngalongage imbembo yani. Inali yo Rurema akambamagalira mu kati ka Yesu Kirisito, kwo nâye gendi gilonge mwi'gulu!

¹⁵ Ngiisi kwo namùbwira buno, iri abandu bangaba bakoli kwaniini, nabo bakwiriiri bakizi biyitoneesa kwo. Ne'ri mwangaba mukiri

ne'gindi-gindi mitono kwi'gambo lirebe, Rurema agaki mütwanganulira Iyo. ¹⁶ Íbiryagagi na'kamaro naaho, tugenderere ukukizi tuula mu ngiisi byo tukoli hisiri kwo!

Abagoma be'kibambo kya Kirisito

¹⁷ E beene witu! Mukizi nyigiraga kwo'mugani, nga kwa'bandi keera bakagunyigira kwo. Nabo kwakundi, yugwo mugani gwabo, mukizi balolera kwo. ¹⁸ Abandu bingi, bakolaga bagoma be'kibambo kya Kirisito. Keera n'gagwanwa namùbwira kwokwo. Na buno, amasu gaani gakoli keresiri mwe'migenge, mu kushubi mùbwira byo. ¹⁹ Emwe! Yabo bagoma, byo bali mu yikumba, galyagagi mabunda gaabo. Ngiisi íbyangabateziizi ishoni, byo banagweti bagayikangaata mwo. Imitono yabo, iyamiri naaho ku bye'kihugo. No'kuheza kwabo, bagashereezibwa.

²⁰ Haliko twehe, imwitu muli mwi'gulu! Tunakoli rindiriiri ku kyedu bweneene kwo Nahamwitu Yesu Kirisito, Lukiza witu, agashubi lyoka yo, ²¹ anahindule amagala giitu. Kundu gakiri mu bukaholwe, haliko gagaki ba no'bulangashane nga ge'mwage. Mukuba, ye hiitagi ubushobozi, bunali bwo atwaziri mwe'bindu byoshi.

4

¹ E beene witu bakundwa! Ngoli mùkumbwiri! Munali mwe bushambaale bwani, kiri no'lushembe lwani. Kwokwo, e bakundwa

baani! Mukizi yamaga musikamiri mu kati ka Nahano!

Amahano ga Pahulu

² Heyudiya na Sindike, bali baali biitu mu kati ka Nahano. Kwokwo, nabayinginga bweneene kwo bakizi yuvwanwa mu kati kaage. ³ Na naawe, we witu mukozi mwemeera, nakuhuuna kwo yabo bamaawe, ubatabaale. Mukuba, yabo bombi twâli kizi himbukira kuguma, mu kukizi kolera Imyazi Miija. Twanâli kizi gikolera kuguma na Kerema, na'biitu bakozi. Yabo booshi, amaziina gaabo gakola mayandike mu kitaabo kyo'bulamu.

⁴ Mukizi yama mushambiiri mu kati ka Nahano! Namùbwira kandi, mukizi shambaala!

⁵ Ubutuudu bwinyu, bukizi menyeekana mu bandu booshi. Mukengeere kwo Nahano akola bu galuka. ⁶ Hatagirage igambo lyo mugakizi ki gerania kwo. Si mu kati ka byoshi, mukizi huuna Rurema, mu kumúyereka amagoorwa giinyu. Munakizi mútangira kongwa. ⁷ Kwokwo, lyo'mutuula gwa Rurema gugakizi mùlanga mu mitima yinyu, na mu nzaliro ziinyu, mu kati ka Yesu Kirisito. Ee! Umutuula gwage, guli gwa'kahebuuza.

⁸ E beene witu! Mu kuyusa, namùbwira kwo mukizi yisaliza ku ngiisi íbiri byo'kuli, na ku ngiisi íbiri byo'lushaagwa, na ku ngiisi íbikwaniini, na ku ngiisi íbiri byeru, na ku ngiisi íbisimisiizi, na ku ngiisi íbiri mu detwa bwija. Iri hangaba hali íbitungiini, kandi iri

ibikwiriiri ukuyivugwa, byebyo bibe byo mugakizi yisaliza kwo! ⁹ Ngiisi byo mukayiga imwani, na ngiisi byo n'gamusigira, mukizi bikulikira, biba byo mukayuvwa imwani, kandi iri byo mukambona kwo. Kwokwo, lyo'mutuula gwa Rurema gugamuyama mwo.

Pahulu adeta kongwa imwa'Bafiripi

¹⁰ Ngoli shambiiiragi bweneene mu kati ka Nahano. Mukuba, ha nyuma lye'siku nyingi, keera kandi mwashubi mbahalira. Ku kasiisa mwâli kizi yama muli no'mwete gwo'kumbahalira. Si mwâli buziri ubulyo bwo'kuguyerekana.

¹¹ Íbitumiri nadeta kwokwo, kutali mbu bwo ndi mu magoorwa. Keera n'gayiga ukuyituugiza mu kati ka byoshi. ¹² Ngoli komiiri ubukeni. Na ngoli komiiri ukutuula mu biri tiita. Ndaanabyo ibikiri mu mbuga, kuba kushalika, kandi iri kuyiguta. Ee! Nangatuula mu biri tiita, kandi iri mu magoorwa. ¹³ Njobwiri ukukizi gira byoshi ku njira ya Kirisito. Mukuba, ye mu mbiika mwe'misi. ¹⁴ Kundu kwokwo, e Bafiripi, mukagiraga bwija mu kundabaala mu makuba gaani.

¹⁵ Ngi kengiiri ulusiku lwo tukatondeera ukumenyeesa abandu Imyazi Miija. Ikyanya n'galyoka mu kihugo kiinyu kye'Makedoniya, ndaalyo lindi ishengero írikaba ne'ngoome na naani mu kundangira ibindu, mútali mwehe naaho, nga kwo muyiji bwija. ¹⁶ Ne'kyanya n'galonga amakuba mu kaaya ke'Tesaloniki, mwâli kizi ndumira yo'butabaazi ubugira kingi. ¹⁷ Íbyatuma ngaadeta kwokwo, kutali mbu lyo

mukizi ndabaala. Si ndoziizi naaho kwo mukizi yushuulirwa ubunguke. ¹⁸ Kwokwo, birya bindu byoshi byo mukandumira ku njira ya Hepafurodito, keera n'gabiyakiira. Byananyukiza amagoorwa gaani gooshi, ne'bindi byanasigala kwo. Yibyo bindu, liri ituulo íriryagagi mu humura bwija. Keera byayemeerwa, binasimisiizi Rurema. ¹⁹ Kwokwo, niinyu, Rurema witu agakizi mùtabaala ku ngiisi magoorwa giinyu, ukukulikirana no'bugale bwage bwa'kahebuuza úbuli mu kati ka Yesu Kirisito! ²⁰ Daata Rurema, ayamage ali mu huuzibwa imyaka ne'myakuula! Bikizi ba kwokwo!

Amagambo go'kusezerana

²¹ Mundamukize abandu booshi ba Rurema mu kati ka Yesu Kirisito! Na beene witu bo tuliriinwi hano, nabo bamulamusa, ²² kuguma na'bandi bandu ba Rurema booshi kwakundi. Ne'ngingwe, ábali mu kolera mu nyumba ya Kahisaari.

²³ Mukizi yama mugashaniirwi mu mitima yinyu mu kati ka Nahamwitu Yesu Kirisito!

**Ibibiriya: Igambo Iya Rurema mu ndeto
ye'kifuliiru
Fuliiru: Ibibiriya: Igambo Iya Rurema mu ndeto
ye'kifuliiru (Bible)**

copyright © 2018 Wycliffe Bible Translators, Inc.

Language: Fuliiru

Contributor: SIL International (in Africa)

All rights reserved.

2020-11-17

PDF generated using Haiola and XeLaTeX on 3 Feb 2023 from source files
dated 29 Jan 2022

871cddeb-c358-58e1-a46a-1b6006a51f3b